

Gobierno lo negocia cu Exxon y ariba exploracion y explotacion di petroleo

ORANJESTAD (AAN) - Den e programa di gobernacion ariba e Diversificacion di

Economia tin varios punto cu mester worde desaroya a corto plaza.

Varios punto di interes

1. Negociacion cu Lago/Exxon. A corto plazo mester bin negociacion cu

EXXON en torno e consecuen-
cianan di e cierre di e refineria
y e obligacionnan cu EXXON
tin pa cu nos pueblo pa asina
definitivamente yega na
decisionnan al respecto.

2. Exploracion y explotacion
di petroleo.

a. Exploracion y explotacion
di petroleo mester worde
desaroya cu prioridad cu vista
ariba e actividadnan
economico cu e lo genera.

b. Entradanan relaciona cu
petroleo mester worde uza na
beneficio di henter pueblo.

c. Companianan involvi den
exploracion y/o explotacion di
petroleo lo mester tuma
medidanan necesario pa evita
daño na e medio ambiente y
tambe duna suficiente garantia
pa cubri gastonan di eventual
daño ambiental causa.

3. Centro Financiero.

Ta sumamente importante
pa adapta e leyman pa desaroya
un Centro Financiero. Esaki
mester sosode cu urgencia en
conexion cu posible es-
tablecimiento di companianan
di seguro y banconan off-shore.

4. Industria. Lo institui un
grupo di trabao pa bin cu in-
centivanan special pa stimula
establecimiento di industria na
San Nicolas y vecindario.

5. Industria chiquito.

a. Industria chiquito lo
worde stimula pa diversifica
economia, crea empleo y
reduci importacion.

b. Pa promove industria chi-
quito Gobierno lo reactiva
Banco di Desaroyo Aruba N.V.
pa duna ayudo financiero y tec-
nico.

c. Gobierno lo reactiva ar-
tesania, cria di porco y galiña,
pesca y horticultura.

6. Zona Franca.

a. Gobierno lo expande e
facilidadnan di zona franca y lo
haci estudio en cuanto di e
posibilidad pa un zona franca
na San Nicolas, Barcadera y
Aeropuerto.

b. Lo reconsidera e rapport
di Booz, Allen & Hamilton pa
asunto di haf.

C. Planta di Awa y
Electricidad (W.E.B.).

Revalua e decision pa muda
W.E.B. pa tereno di Lago y
studia alternativanan teniendo
cuenta cu aspectonan ambien-
tal, financiero, turistico y e con-
dicion fisico di e planta.

D. Telecomunicacion.

a. Gobierno lo evalua e
estructura y leyman cu ta gober-
na SETAR, revisa e leyman ex-
istente di comunicacion y
dedica atencion na e ubicacion
di edificionnan di SETAR.

d. Lo dedica atencion special
pa atrae industria inter-
nacional ariba tereno di
procesamento di data.

c. Gobierno ta di opinion cu
SETAR mester keda un
empresa di Gobierno.

E. Aviacion.

a. Mirando e necesidad pa
yena e cambernan di hotel
Gobierno lo percura pa atrae
vuelonan regular for di des-
tinacionnan nobo y amplia e
cantidad di vuelonan for di
esnan existente.

b. Gobierno lo hiba un
manejo den cual lo negocia
tratadonan di aviacion y con-
venionan administrativo cu
paisnan cu tin interes turistico,
economico y comercial.

F. Ley di construccion/Con-
sejo di Urbanizacion.

Gobierno lo renova e or-
denanza di construccion mas
pronto cu ta posible. Lo instala
un Consejo di Urbanizacion.

G. Control di prijs.

a. Gobierno lo establece un
control di prijs ariba un pakete
di productonan di primera
necesidad y remedi.

H. Ayudo economico hulandes.

Ayudo economico hulandes
mester worde destina pa
desaroyo di e pueblo den su
totalidad y cu control di Par-
lamento.